

# Powšitkowne WOZJEWJENJA

njedźelu, 20. nowembra 2022

## Wusyłanje Božeje mše

Serbskorěčnu Božu mšu móža wěriwi tutu njedźelu, 20. nowembra, w 9 hodź. znova z Chróscic jako livestream scěhować. Link na nju je w interneće pod [www.posol.de](http://www.posol.de) kaž tež na wosadnej stronje podaty.

## Młodostni na Chrysta Krala do Chróscic

Nyšpor – wosebje za wšitkich młodostnych – budže na swjedženju Chrysta Krala, tutu njedźelu, 20. nowembra, w 14 hodź. w Chróšćanskim Hórnikowym domje. Po tym su młodostni na přednošk a k zhromadnej swačinje na faru přeprošeni. Nadrobniše informacije su pod [www.posol.de](http://www.posol.de) wozjewjene.

## Na adwentne spěwanje

Chór Lipa z.t. přeprošuje wšitkich zajimcow sobotu, 26. nowembra, w 17.30 hodź. na adwentny nyšpor do cyrkwy klóštra Marijineje hwězdy w Pančicach Kukowje. Wuhotuja jón zhromadnje z Markklebergskimi wokalistami. Na wopytowanju čaka rjad adwentnych a druhich cyrkwinskih pěsnjow. Zastup je darmotny, při durjach pak budže kolekta.

## Adwentne popołdno w Drježdźanach

Na serbske ekumeniske adwentne popołdno w Drježdźanach su wšitcy zajimcy sobotu, 26. nowembra, w 15 hodź. přeprošeni. Wone wotmjeje so we wosadnicy fary swjateho Měrcina, Stauffenbergowa 9G, 01099 Drježdźany, a nic we wosadnicy fary swjateho Hubertusa, kaž druhdze wozjewjene. Nyšpor zmjeje serbski superintendent Krystof Rummel. Přizamknjetej so bjesada a swačina. Zdobom předstaji tam Smolerjec kniharja wuběr lětušich najnowšich wudaćow.

## Přednošk wo klóštrje Oseku

Wolfgang Sperling ze Smječkec budže štwórtk, 1. decembra, w 19 hodź. w farskej wikariji w Pančicach-Kukowje wo cisterciensach a klóštrje w sewjeroněmskim Oseku přednošować. Referent je předsyda němskeho přečelskeho kruha tamnišeho klóštra.

## Pomocna akcija za Bačońske pišćece

Towarstwo Cyrila a Metoda z.t. chce ze swojej nazymskej akciju „Łužica pomha“ lětsa zakładne ponowjenje Bačońskich pišćelow podpěrać. Nadrobnje je to w Katolskim Posole 23. oktobra wopisane. Štóz chcył k tomu přinošować, njech přepokaza swój dar na konto Towarstwa Cyrila a Metoda z.t. (TCM): Cyrill-Methodius-Verein e.V., IBAN DE65 7509 0300 0008 2823 66, hesło: „Bačoń“. Ći, kotřiž sej darowanju kwitowanju přeja, měli swoju adresu sobu podać. Nadrobniše informacije k tutej akciji su na 3. stronje Powšitkownych wozjewjenjow podate.

## Modlenje w Róžeńće

Na modlenje swjateho różowca a před Najswjećišim su wěriwi sobotu, 3. decembra, we 18 hodź. do Róžeńčanskeje hnadowneje cyrkwy přeprošeni. Paćerje budu serbsce a němsce spěwane. Hižo wot 17.30 hodź. zanjese spěwna skupina adwentne spěwy.

## **Adwentny hudźbny nyšpor w klóštrje**

Druhu adwentnu njedzelu, 4. decembra, su wšitcy zajimcy na hudźbny nyšpor do klóšterskeje cyrkwyje w Pančicach-Kukowje přeprošeni. Započatk je w 16.30 hodź. Na piščelach zahraje serbski organist a komponist Feliks Brojer. Nimo swójskich kompozicijow zaklinča mjez druhim twórby Johanna Sebastiana Bacha, Gottfrieda Augusta Homiliusa a Alexandreja Guilmanta. Liturgiski nawod změja cistercienske sotry a pater Johannes Müller.

## **Hodowna pakćikowa akcija**

Towarstwo swjateje Filomeny z.t. chce tež lětsa zaso džěci a swójby w maćerno-džěćacym domje w Dolním Podluží kaž tež w boħarskim Razgradze a wokolnych wsach z hodownymi pakćikami zwjeselić. Wobsah pakćikow njeje předpisany. Darić hodža so na přikład kakaw, słódkosće, hrajkki abo pisanske materialije. Spomóžne by było, by-li pakćik nalěpk měł, na kotrymž je cilowa skupina podata, na přikład „holca 14 do 16 lět“ abo „swójba“. Pakćiki kaž tež počehnjena a hygieniske twory zběraja wot pónđzele do štwórtka, 21. do 24. nowembra, wšědnje wot 17 do 18 hodź. w kulturnym domje we Smjerdžacej. Trjebanu drastu a črije lětsa njechromadža. Z pjenježnymi darami maja so přenjořadnje transportne košty narunać. Kwitowanku za pjenježne dary po přeću wustaja. Dalše informacije podawa Gerat Róbl w Smjerdžacej pod telefonowym čisłom (01 72) 7 94 75 22.

## **Zetkanje samostejacych**

Samostejacy ze serbskich wosadow su na swoje přichodne zetkanje wutoru, 6. decembra, w 14 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 29. nowembra, w redakciji Katolskeho Posoła přizjewja, telefonowe čisło (0 35 91) 55 02 12. Tež dalši zajimcy su wutrobnje witani. Kóždy njech sej Wosadnik sobu přinjese. Štóž chce wotewzaty być, njech to prošu zdžěli.

## **Putnikowanje do Krupki**

Pěše putnikowanje młodostnych do Krupki wotměje so klětu wot njedzele do pjatka, 13. do 18. awgusta. Putniske kemše budu srjedu, 16. awgusta, w 10 hodź.

## **Pytaja wosobu za džěćacu pastoralku**

W dekanatnym dušepastyrstwe za džěci a młodzinu we Worklecach ma so wot 1. januara 2023 wobmjezowane jako zastup za dobu staršiskeho časa džělowe městno w pastoralce za džěci wobsadzić. Tydženski džělowy čas wučinja 20 hodžin. Pisomne požadanja přijimuje personalny wotrjad biskopskeho ordinariata, Käthe-Kollwitz-Ufer 84, 01309 Drježdžany hač do srjedy, 30. nowembra. Podložki hodža so tež digitalnje z mailku na [bewerbung@bddmei.de](mailto:bewerbung@bddmei.de) zapodać. Link na nadrobne wupisanje je pod [www.posol.de](http://www.posol.de) podaty.

## **Pytaja wosobu za putniku cyrkej**

Klášter Marijina hwězda w Pančicach-Kukowje pyta za putniku cyrkej w Róžeńće wosobu, kotraž chcyła nadawki zwónka a rjedzerskeje mocy přewzać. Městno ma so klětu 1. januara wobsadzić a je najprjedy na jedne lěto wobmjezowane. Pozdžiše krute přistajenje je wotmyslene. Zajimcy měli so hač do srjedy, 30. nowembra, w klóštrje Marijinej hwězdzje přizjewić. Nadrobne wupisanje džěloweho městna je pod [www.posol.de](http://www.posol.de) wozjewjene.

## **Nowa zwukowa instalacija w Rakecach**

Nowu spirituelnu zwukowu instalaciju k temje „Stwórba“ móža wopytwarjo w Rakečanskej ewangelsko-lutherskej cyrkwi dožiwić. Zakład twori bibliski tekst wo stworjenju swěta. Hudźba zwjazuje filmowu hudźbu z klasiskimi zwukami kaž tež popowu hudźbu ze zwukowymi kolažemi. Wotpowědne swětłowe efekty tekst wudospolnjeja. Wopytwarjo móža so w cyrkwi pohibować a dožiwja tak něhdže 20mjeńšinsku awdijo-wizuelnu instalaciju ze wšelakich perspektiwow. Projektowu ideju wuwil a zwoprawdźil je tamniši Pawołski chór pod nawodom Norberta Bindera zhromadnje z chórom Serbskeho ludoweho ansambla. Instalacija je hač do přichodneho pjatka, 25. nowembra, wšednje wot 9 do 20 hodź. přistupna. Zastup je darmotny.

## **Na swětowe zetkanje młodžiny do Lissabona**

Drježdžansko-Mišnjanske biskopstwo přeprošuje młodostnych a młodych dorosćenych wot 16 do 35 lět, sej klětu w lěću na swětowe zetkanje młodžiny do portugalskeje stolicy Lissabona dojeć. Jězba wotměje so wot póndžele, 24. julija, do wutory, 8. awgusta 2023. Městna su wobmjelowane. Nadrobniše informacije su pod [www.posol.de](http://www.posol.de) wozjewjene.

## **Znowa zhromadny skutk wšěch katolskich Serbow**

TCM „Łužica pomha“ chce za Bačońske pišćece pjenjezy

Zakładne ponowjenje Bačońskich pišćelow chce Towarstwo Cyrila a Metoda z.t. (TCM) ze swojej lětušej nazymskej akciju „Łužica pomha“ podpěrać. Zdobom hromadza zaso dary za Caritu w pólskim Elku. To připowědźi předsyda TCM Cyril Hančik, rjeknywši, zo je so předsydstwo towarstwa na to dojednało.

„Hižo před wjace hač 130 lětami je naše towarstwo twar Bačońskeje cyrkwy nastorčilo a so wo financowanje twara z pomocu wšěch serbskich wosadow postarało. Na to nawjazuju chcemy tež nětkole ponowjenje kralowny instrumentow w tutym Božim domje sobu podpěrać“, rozłóži předsyda TCM, při čimž skedźbni na wosebity zwisk k tutej cyrkwi.

Bačoński wosadny farar Gerat Warnar wotpohlad jara wita a by so wjeselił, by-li ponowjenje pišćelow było znowa zhromadny skutk wšitkich katolskich Serbow. Wón rozjasnja: „Wšojedne hač je wosada wulka abo mała, wudawki za tajkile instrument su přeco wulke. Ale naša po ličbje poměrnje mała wosada njemóže financowanje sama zaručić.“ Ponowjenje ma 87.200 eurow płaćić. Drježdžansko-Mišnjanske biskopstwo spěchuje tajke džěta po džesać procentach, potajkim z 8.700 eurami. Wot pomnikoškitneho zarjada wočakuje farar Warnar 8.500 eurow. „Nadžijamy so, zo móžemy 35.000 eurow jako dary zwjesć. Potom bychmy z budgeta wosady tohorunja 35.000 eurow nałožić móhli a bychmy tak wšo zaručene měli.“

Pišćece w Bačońskej cyrkwi Jězusoweje wutroby buchu 1889 pod nawodom bratrow Emila a Bruna Jehmlicha natwarjene. Při tym jedna so wo posledni w 19. lětstotku jako mechaniske registrowe pišćece (Schleifladenorgel) nastaty instrument tuteje wot lěta 1808 wobstejaceje Drježdžanskeje pišćeletwarskeje džěłarnje. Wón ma dwaj manualej a 16 registrow. „Originalne małe pišćece – němsce Orgelpfeifen – z cyna buchu w Prěnjeje swětowej wójnje sćazane. W naslědowacych lětach buchu z cynkowymi narunane“, Bačoński farar wuswětla. Dopominajo so na poslednje wjetše ponowjenje w lěće 1991 wón praji, zo pak njeběše wone tak wobšěrne kaž nětkole předwidžane. Wo to postara so firma Ekkeharta Großa z Wadec pola Kubšic. Pišćeletwarc bu w firmje Eule wukubłany.

Štóz chcył ponowjenje Bačońskich pišćelow pjenježnje podpěrać, njech přepokaza swój dar na konto towarstwa: Cyrill-Methodius-Verein e.V., IBAN DE65 7509 0300 0008 2823 66, hesło: „Bačoń“. Ći, kotřiž sej darowanju kwitowanku přeja, měli swoju adresu sobu podać.